

**Protocolo de colaboración entre o Parlamento de Galicia e a  
Federación Galega de Institucións para a Síndrome de Down (Down  
Galicia) para a realización de actividades de asesoramento e apoio na  
inserción laboral de persoas con discapacidade intelectual na  
Administración do Parlamento de Galicia**

**REUNIDOS**

Dunha banda, o Excmo. Sr. D. **Miguel Ángel Santalices Vieira**, na súa condición de presidente do Parlamento de Galicia, actuando ao abeiro das facultades que lle confire o artigo 31.1 do Regulamento do Parlamento de Galicia.

Doutra, don **Delmiro Prieto González** (DNI nº 71497418D), presidente da Federación Down Galicia (CIF nº G15665144), nomeado pola Asemblea Xeral da Federación en exercicio das súas competencias, de acordo co establecido nos artigos 26 e 29 dos estatutos aprobados pola Asemblea Xeral extraordinaria da Federación en data do 9 de maio de 2015.

Ambas as partes recoñecen a súa competencia e capacidade para formalizar este PROTOCOLO DE COLABORACIÓN, e para tales efectos

**EXPOÑEN**

**Primeiro.** O Parlamento de Galicia está comprometido coa integración das persoas con síndrome de Down no eido social galego, en todos os planos da vida pública e cultural, así como no acceso ao ámbito laboral. Para dar cumprimento a este compromiso quere seguir contribuindo a facilitar, na medida das súas posibilidades, a promoción e consolidación de todas as medidas viables e dos medios que sexan necesarios e eficaces para conseguilo.

**Segundo.** A federación Down Galicia ten como fin xeral coordinar, apoiar e impulsar o labor de contribución das entidades membro cara á mellora da calidade de vida de cada persoa con síndrome de Down e discapacidade intelectual e a das súas familias, a través da plena inclusión social e da utilización dos recursos ordinarios da comunidade, asumindo o establecido na Convención das Nacións Unidas sobre dereitos das persoas con discapacidade.

Así mesmo, e de acordo co recollido nos seus estatutos, a Federación Down Galicia dirixirá a súa actuación á consecución, entre outros, dos seguintes obxectivos:

- Promover proxectos de integración escolar, laboral e social, programas de saúde e todos aqueles que favorezan o desenvolvemento persoal e a plena inclusión das persoas con síndrome de Down e discapacidade intelectual.
- Establecer e manter relacións de colaboración con outras organizacións que teñan obxectivos similares.
- Fomentar todas aquelas políticas de discriminación positiva que promovan a inclusión social en todos os ámbitos (escolar, familiar, social, laboral...) das mulleres e homes con síndrome de Down e discapacidade intelectual.
- Promover a autonomía persoal das persoas con síndrome de Down e discapacidade intelectual.
- Favorecer a inclusión social das persoas con síndrome de Down e discapacidade intelectual en todas as etapas da súa vida, evitando a exclusión social e aumentando a súa participación no mercado de traballo, para lograr unha igualdade real de oportunidades e conseguir a súa plena inclusión en todos os ámbitos (familiar, escolar, laboral e social).

A Federación Down Galicia, para a consecución dos seus obxectivos e no marco deste protocolo, contará co apoio e traballo coordinado coas súas entidades membro:

RAZÓN SOCIAL ENTIDADE MEMBRO	CIF ENTIDADE
Down Vigo, Asociación para el Síndrome de Down	G-36.697.324
Down Pontevedra <i>Xuntos</i> , Asoc. Síndrome de Down	G-36.164.887
Asoc. Síndrome de Down <i>Teima</i> de Ferrol	G-15.458.060
Fundación Down Compostela	G-70.040.258
Down Coruña, Asociación para el Síndrome de Down	G-15.731.466
Asociación Síndrome de Down de Lugo - Down Lugo	G-27.202.043
Down Ourense	G-32.311.870

PARLAMENTO  
DE GALICIA  
PRESIDENCIA

**Terceiro.** É vontade de ambas as institucións colaborar no desenvolvemento de iniciativas conxuntas que favorezan a integración das persoas con síndrome de Down no eido social galego, en todos os planos da vida pública e cultural, así como no acceso ao ámbito laboral.

Para estes fins, no exercicio das competencias que lles son propias, as partes recoñécense mutuamente plena lexitimación, capacidade e representación para a sinatura deste PROTOCOLO DE COLABORACIÓN, que se rexerá polas seguintes

## CLÁUSULAS

### Primeira. Obxecto e fins do protocolo

Este protocolo ten por obxecto establecer os mecanismos de colaboración entre o Parlamento de Galicia e a Federación Down Galicia, para fixar o marco xeral de actuación de cara ao deseño e realización de actividades que teñan por finalidade facilitar a adaptación e o desenvolvemento das funcións nos postos de traballo das persoas con síndrome de Down que puideren prestar servizos na Administración do Parlamento de Galicia, ben como persoal funcionario de carreira ou laboral fixo e interino ou laboral de carácter temporal, ben como persoal en prácticas e/ou formación.

## Segunda. Compromisos das partes

O Parlamento de Galicia e a Federación Down Galicia, en coherencia coas súas respectivas funcións e no marco deste protocolo, comprométense a colaborar no desenvolvemento dos seus fins, mediante accións que se plasmarán a través dos correspondentes convenios de colaboración.

Para tal fin, ambas as partes comprométense a desenvolver no futuro actividades no eido da formación, tales como as relativas á preparación e desenvolvemento de:

Cursos de formación específicos previos ao ingreso ou ao inicio da prestación de servizos no Parlamento de Galicia, que serán impartidos por persoal do Parlamento de Galicia co apoio de persoal da Federación Down Galicia.

- Apoio no proceso de inserción e adaptación efectiva ao posto de traballo das persoas traballadoras con síndrome de Down, así como do seu contorno laboral.
- Seguimento do desempeño da actividade laboral, incluíndo formación continua en competencias instrumentais, transversais e laborais para este colectivo, de acordo cos resultados da detección de necesidades formativas.
- Realización de talleres prácticos de intercambios de experiencias dirixidos ao persoal que realiza funcións de referencia no ámbito de traballo deste colectivo.

## Terceira. Financiamento

A sinatura deste protocolo non comporta ningunha obriga económica. De ser o caso, determinarase nos correspondentes convenios de colaboración que deriven deste protocolo.

## Cuarta. Difusión da colaboración das partes

A sinatura deste protocolo supón o consentimento expreso de ambas as partes para faceren públicos, a través dos diarios oficiais que procedan e das respectivas páxinas web, os datos referidos ao seu contido, de conformidade coa normativa sobre transparencia e boas prácticas que sexa de aplicación a cada unha delas.

### **Quinta. Comisión de seguimento**

Establécese unha comisión de coordinación e seguimento deste protocolo que estará integrada por dous representantes do Parlamento de Galicia, un dos cales a presidirá, e por dous representantes da Federación Down Galicia, un dos cales será o presidente ou persoa na que delegue.

A dita comisión coordinará o seu desenvolvemento e estará facultada para resolver cantas dúbidas puideren xurdir na súa execución. Poderá estar asistida polos técnicos que xulguen necesarios.

Os acordos adoptados pola Comisión serán inmediatamente executivos.

Terá, ademais, as seguintes funcións:

- A interpretación do protocolo.
- A proposta de addendas ou modificacións.
- A elaboración do informe previo á resolución por incumprimento.
- A facultade de supervisión da execución e a adopción das decisións e ditado das instrucións necesarias co fin de salvagardar a correcta realización das accións acordadas.
- Calquera outra relacionada co bo funcionamento deste protocolo.

### **Sexta. Prazo de vixencia, modificacións e causas de resolución**

Este protocolo producirá efectos a partir da data da súa sinatura e terá unha vixencia dun ano, prorrogable por períodos sucesivos anuais ata un máximo de catro anos, mediante acordo expreso das partes ao remate de cada período, agás que se resolva por algunha das causas seguintes:

- a) Mutuo acordo das partes manifestado por escrito.
- b) Denuncia feita por calquera das partes, con tres meses de antelación.
- c) Incumprimento grave de calquera das partes dos acordos do protocolo.

Así mesmo, as partes poderán modificar os termos deste protocolo de acordo mutuo.

### Sétima. Natureza xurídica

Este protocolo de colaboración ten natureza administrativa, está excluído do ámbito de aplicación do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público, e rexerese polas súas propias cláusulas e, de forma supletoria, polas normas xerais do dereito administrativo

### Oitava. Protección de datos de carácter persoal

En cumprimento do disposto no artigo 5 da Lei orgánica 15/1999, de protección de datos de carácter persoal, infórmase de que, de existiren no eido deste protocolo datos de carácter persoal, se incorporarán a un ficheiro para o seu tratamento, coa finalidade da xestión deste procedemento. A Federación Down Galicia poderá exercer os dereitos de acceso, rectificación, cancelación e oposición previstos na lei mediante un escrito dirixido á Oficialía Maior.


### Novena. Transparencia e bo goberno

A sinatura deste protocolo de colaboración leva implícito o consentimento expreso das persoas intervenientes para que o Parlamento de Galicia poida facer públicos os datos de carácter persoal que figuren nel, de acordo co disposto na Lei 19/2013, do 9 de decembro, de transparencia, acceso á información pública e bo goberno, e a Lei galega 1/2016, do 18 de xaneiro, de transparencia e bo goberno.

En proba de conformidade asinan este protocolo de colaboración por triplicado en Santiago de Compostela o 9 de abril de 2018.

  
**Miguel Ángel Santalices Vieira**  
Presidente do Parlamento de Galicia

PARLAMENTO  
DE GALICIA  
PRESIDENCIA

  
**Delmiro Prieto González**  
Presidente da Federación Down Galicia